

## **U IME FEDERACIJE BOSNE I HERCEGOVINE**

Kantonalni sud u Bihaću u vijeću sastavljenom od sudija Kapić Reufa kao predsjednika vijeća, te Hodžić Fikreta i Hergić Ernese kao članova vijeća, uz sudjelovanje zapisničara Rahmanović Senide, postupajući u krivičnom predmetu protiv optuženog Grbić Miroslava zvan „Mišo“ sin N. i majke B. rođene L., zbog krivičnog djela ratni zločin protiv civilnog stanovništva iz člana 142 stav 1 preuzetog KZ SFRJ nakon održane glavne usmene i javne rasprave i ročišta za razmatranje sporazuma o priznanju krivnje od 31.05.20011. godine u prisutnosti kantonalnog tužioca iz Bihaća, Felić Nazifa, optuženog Grbić Miroslava i njegovog branioca po službenoj dužnosti Mamontov Danka advokata iz Bihaća, dana 31.05.2011.godine donio i javno objavio slijedeću

## **P R E S U D U**

Optuženi Grbić Miroslav zvan „Mišo“ sin N. i majke B. rođene L., rođen 15.05.1962. godine u mjestu J. općina B. P. gdje i stanuje, po nacionalnosti ..., državljanin ..., JMBG: ..., po zanimanju mašin-bravar, oženjen, otac dvoje djece, pismen sa završenom srednjom školom, bivšu JNA služio 1982/1983 u Z., bez čina i odlikovanja, vodi se u vojnoj evidenciji OMO B. P., lošeg imovnog stanja, ranije osuđivan zbog ...,

## **K R I V I E**

### **Što je:**

U toku oružanog sukoba u R BiH između Armije BiH i Vojske Republike Srpske kao pripadnik petrovačke čete V.P. 7463 P. u sastavu vojske Republike Srpske suprotno odredbi iz člana 3.stav 1.tačka a ) Ženevske konvencije o zaštiti građanskih osoba za vrijeme rata od 12. augusta 1949. godine te člana 4.stav 1 i 2 dopunskog Protokola o zaštiti žrtava međunarodnih oružanih sukoba uz navedenu konvenciju tako što je:

Dana 22.09.1992. godine u poslijepodnevnim satima vraćajući se kući iz vojne jedinice gdje je bio raspoređen naoružan automatskom puškom i u vojnoj uniformi u društvu sa Š. R. došao kod kuće vlasništvo B. F. u naselju G. u B. P., pa nakon što je u

dvorištu te kuće ugledao oštećenog B. F. i H. F. te nakon što su ovi pobjegli u spomenutu kuću te znajući šta se u to vrijeme dešavalo nesrpskom življu na području općine B. P. prijetećim glasom „izlazite ustaše“, tražio da ovi izađu iz kuće pa kad su B. F. i H. F. bojeći se za vlastiti život iskočili kroz prozor kuće pokušavajući pobjeći u namjeri da liši života ispalio jedan metak iz automatske puške u pravcu B. F. kojom ga je prilikom pogodio u predio gornje desne slabinske regije nanijevši mu zastrijelnu ranu i oštećenje na tom dijelu kože potkožnog tkiva i mišićnog sloja zbog koje rane je oštećeni B. F. trpio snažne tjelesne bolove.

Dakle, kao vojnik Republike Srpske kršeći pravila međunarodnog prava za vrijeme rata u R BiH pokušao lišiti života jedno civilno lice.

Čime je počinio krivično djelo-ratni zločin protiv civilnog stanovništva iz člana 142. stav 1. preuzetog KZ SFRJ pa ga sud uz primjenu istih zakonskih propisa i uz primjenu odredbe iz člana 43.KZ SFRJ i člana 246.stav 5. ZKP FBiH

## **O S U D U J E**

### **NA KAZNU ZATVORA U TRAJANJU OD 3 ( TRI ) GODINE**

Na osnovu odredbe iz člana 212.stav 3. ZKP FBiH oštećeni B. F. sin H. iz B. P. s imovinsko pravnim zahtjevom upućuje se da isti ostvaruje u parničnom postupku.

Na osnovu odredbe iz člana 202.stav 4. ZKP FBiH optuženi se oslobađa od snošenja troškova krivičnog postupka, te isti padaju na teret budžetskih sredstava ovog suda.

## **O b r a z l o ž e n j e**

Kantonalno tužilaštvo u Bijaću optužnicom broj: TO1 0 KTRZ 0003566 11 od 31.03.2011. godine optužilo je Grbić Miroslava sina N. da je u vremenu i na način činjenično opisanog u dispozitivu optužnice počinio krivično djelo ratni zločin protiv civilnog stanovništva iz člana 142. stav 1. preuzetog KZ SFRJ.

Kantonalno tužilaštvo u Bijaću činjenično je opisalo u optužnici radnje koje se optuženom stavljaju na teret s tim da je pravno kvalifikovalo navedene radnje kao izvršenje krivičnog djela ratni zločin protiv civilnog stanovništva iz člana 142. stav 1. preuzetog KZ SFRJ, te ovaj sud u konkretnom slučaju prihvata ovakvu pravnu kvalifikaciju, a to iz razloga što je u vrijeme izvršenja radnji ovog krivičnog djela koje se optuženom stavlja na teret na snazi bio preuzeti KZ bivše SFRJ koji krivično djelo ratni zločin prema civilnom stanovništvu inkriminira odredbom iz člana 142. Zakona, a kojim je za počinjenje navedenog krivičnog djela predviđena kazna zatvora od najmanje 5 godina ili smrtna kazna. Kako je u Anexu I Ustava BiH predviđeno da će se uz ostale dodatne sporazume o ljudskim pravima primjenjivati Međunarodni ugovor o građanskim i političkim pravima iz 1966. godine, te kada se uzme u obzir član 2 Evropske konvencije i član 1 i 2 Protokola broj 6 uz Konvenciju iz kojih se vidi da je isključena mogućnost izricanja smrtno kazne ili njenog izvršenja u vrijeme mira, iz toga proizilazi da domaći sudovi nakon potpisivanja Dejtonskog sporazuma za mir BiH ne mogu izricati smrtnu kaznu, to je evidentno da se optuženom primjenom

navedenog Zakona maksimalno može izreći kazna zatvora do 15 godina, pa je navedeni Zakon koji je važio u inkriminirano vrijeme po optuženog povoljniji stoga se pravna ocjena navedenih radnji izvršenja i po stajalištu ovog suda ima odrediti po članu 142. preuzetog KZ SFRJ, te u konkretnom slučaju primjena bilo kojeg drugog zakona umjesto preuzetog KZ SFRJ koji je bio na snazi u vrijeme relevantno za ovaj krivični predmet predstavljala bi kršenje načela zakonitosti.

Optužnica je dana 01.04.2011. godine potvrđena od strane sudije za prethodno saslušanje.

Dana 09.05.2011. godine na zapisniku kod ovog suda kod sudije za prethodno saslušanje optuženi se izjasnio da nije kriv povodom jedine tačke optužnice koja mu se stavlja na teret izvršenje krivičnog djela ratni zločin protiv civilnog stanovništva.

Na ročištu od 31.05.2011. godine ovaj sud je zaprimio sporazum o priznanju krivnje zaključen između Tužilaštva USK i optuženog Grbić Miroslava i njegovog branioca advokata Mamontov Danka.

Sud je u skladu sa članom 245. ZKP FBiH razmotrio zaključeni sporazum o priznanju krivnje kojim je optuženi Grbić Miroslav priznao krivnju za izvršenje krivičnog djela ratni zločin protiv civilnog stanovništva iz člana 142. stav 1. preuzetog KZ SFRJ.

U sporazumu je između ostalog predloženo da se optuženom za počinjeno krivično djelo ratni zločin protiv civilnog stanovništva iz člana 142. stav 1. preuzetog KZ SFRJ izrekene kazna zatvora u trajanju od 3 godine, što jasno proizilazi iz tačke 3 ovog sporazuma. Tokom pretresa za razmatranje sporazuma o priznanju krivnje, održanog dana 31.05.2011. godine, sud je utvrdio da je optuženi navedni sporazum zaključio dobrovoljno, svjesno i sa razumijevanjem, a nakon što je upoznat sa mogućim posljedicama, uključujući posljedice vezane za imovinsko prani zahtjev i troškove krivičnog postupka. Takođe, tužilaštvo je tokom pretresa prezentiralo sudu dokaze iz kojih proizilazi da je optuženi Grbić Miroslav počinio krivično-pravne radnje naznačene u optužnici. Odbrana optuženog se u cjelosti složila sa prijedlogom Tužilaštva.

Sud je u skladu sa navedenim sporazumom utvrdio da postoji dovoljno dokaza koji potvrđuju krivnju optuženog, kao i da je optuženi razumio da se na ovaj način odriče prava na redovno suđenje i da ne može uložiti žalbu na krivično-pravnu sankciju koja će mu biti izrečena, shodno čemu je sklopljeni sporazum prihvaćen od strane stranaka u postupku u cjelini.

Tokom ročišta za izricanje krivično-pravne sankcije, održanog istog dana, odnosno 31.05.2011. godine, Tužilaštvo je istaklo da je prilikom predlaganja vrste i visine krivično-pravne sankcije u odnosu na optuženog, cijenilo činjenicu da je optuženi priznao izvršenje krivičnog djela za radnje pobliže opisane u optužnici, njegovo iskreno kajanje i doprinos da se postupak okonča u kratkom vremenom roku, čime bi se izbjegli dodatni troškovi.

Sud je prihvatajući sporazum u cjelini našao da su ispunjeni svi uslovi iz člana 245. ZKP FBiH, te izvršio uvid u slijedeće dokaze Tužilaštva USK

- Zapisnik o saslušanju svjedoka B. F. od 17.08.2007.godine
- Zapisnik o saslušanju svjedoka B. F. od 25.03.2011.godine
- Zapisnik o saslušanju svjedoka H. F. od 20.07.2006.godine
- Zapisnik o saslušanju svjedoka B. D. od 30.08.2007.godine
- Zapisnik o saslušanju svjedoka R. A. od 30.08.2007.godine
- Zapisnik o saslušanju svjedoka M. R. od 03.09.2007.godine
- Zapisnik o saslušanju vještaka Dr. Durmišević Dževad 25.03.2011.godine
- Izvod iz KE za optuženog Grbić Miroslava od 14.03.2011.godine
- Akt Opštine P. broj 02-835-18/11 od 21.03 2011.godine
- Fotodokumentacija ranjavanja oštećenog B. F. od 17.08.2007.godine
- Fotodokumentacija povreda na tijelu oštećenog B. F. od 25.03.2011.godine

Sud je utvrdio da postoji dovoljno dokaza o krivnji optuženog te je prihvatio sporazum o priznanju krivnje, jer nije našao smetnje kod pregovaranja o krivnji u smislu odredbe člana 246 ZKP FBiH.

Odlučujući o visini krivično pravne sankcije, sud je kao olakšavajuće okolnosti na strani optuženog cijenio njegovo priznanje za počinjeno krivično djelo, koje priznanje je i rezultiralo sklapanjem sporazuma o priznanju krivnje, saradnju sa Tužilaštvom, iskreno kajanje, ne nalazeći pri tom otežavajuće okolnosti.

Sljedom navedenog, sud je optuženog oglasio krivim za izvršenje krivičnog djela ratni zločin protiv civilnog stanovništva iz člana 142 stav 1 preuzetog KZ SFRJ.

Navedenom krivično pravnom sankcijom će se, po uvjerenju suda, u cjelosti postići svrha kažnjavanja, izraziti društvena osuda učinjenog krivičnog djela te svakako uticati na svijest građana o neprihvatljivosti i štetnosti krivičnih djela i pravednosti kažnjavanja učinioaca.

Na osnovu odredbe iz člana 212. stav 3. ZKP FBiH oštećeni B. F. sin H. iz B. P. s imovinsko pravnim zahtjevom upućuje se da isti ostvaruje u parničnom postupku.

Na temelju odredbe iz člana 202. stav 4. ZKP FBiH optuženi se oslobađa plaćanja troškova krivičnog postupka iz člana 199. stav 2. tačka a)-h), dok nagrada i nužni izdaci branioca po službenoj dužnosti padaju na teret sredstava suda jer je tokom postupka sud utvrdio da je optuženi lošeg imovnog stanja da troškove postupka ne može platiti, a da time ne dovede u pitanje izdržavanje porodice.

Na osnovu svega naprijed navedenog odlučeno je kao u izreci presude

**ZAPISNIČAR**  
**Senida Rahmanović**

**PREDSJEDNIK VJEĆA**  
**Kapić Reuf**

#### **PRAVNA POUKA**

Protiv ove presude nije dozvoljena žalba protiv odluke o izrečenju krivično pravnoj sankciji ( član 246. stav 4. Tačka c) ZKP FBiH) dok se u ostalom dijelu presuda može pobijati žalbom Vrhovnom sudu FBiH Sarajevo putem ovog suda u roku od 15 dana po prijemu ove presude.